

Enn Lápptopp muss merr hawwe.

Gestern hotts onn de Hausdier geklingelt unn als ich die Dier uffgemacht habb, hotts Kättche mett zwaa Dutte in de Hond devor gestonne.

Ei gude Kättche, habb ich gesacht unn habb die Dier sperrongelweit uffgemacht. Komm eroi. Schee dassde uns emol besuche dust – wo issen de Schorsch?

Ess Kättche iss ins Haus unn in die Kich kumme, hott ihr Dutte abgestellt unn sich erstemol gesetzt.

Was merr vor de Feierdaach ferr Laaferei hott, sachtse unn schnauft zimlich hefdisch.

Moi Fraa iss aus de Wäschkich kumme, die zwaa hawwe sich begrießt unn die Fraa hotts Kättche gefroocht: Willsden Kaffee?

Ess Kättche hott de Kopp geschittelt. Naa, heit nit, donke schee.

Ich habb nochemol gefroocht: Wo iss dann de Schorsch? Der hätt derr doch helfe kenne die schwere Dutte ze traache.

Heer merr uff mett dem, sachtse unn guckt so dass ichse frooche musst: Iss was mettem Schorsch, isser kronk? Om Sunndaach warer noch gut druff.

Doo sächst Kättche: Glaabt merrs, der hott nor noch Bosse im Kopp.

Die Fraa frächt: Jetzt erzähl emol, was hotter dann ferr Bosse?

Ess Kättche hott dief Luft gehollt. Der iss heit moie schunn widder in so ennKombjuder-Markt gefahrn, weiler sich dort so enn Lápptopp oogucke will. Also, so e Ding willer sich kaafe, unn ihr glaabt gar nit, was de Schorsch jetzt so ferr Ausdruck druffhott, ich konnse gar nit all behalle: Megabeit, Flätträt, Weierless, Guugel, lebee, Professor ...

Ich habbse unnerbroche. Kättche, doo hotter bestimmt Prozessor gesacht, awwer dess konnst du joo nit wisse.

Ess Kättche hott genickt unn e bissi geflennt. Guck liewer in die Nadur, habb ichem gesacht, wies iwverall so schee blicht. Unn guck nooch de Veechel, dess hosde doch immer so gern gemacht, ich habb gestern schunn die erst Schwalb geseh. Geh enaus, laaf e bissie unn hock dich nit dauernd hie unn les Kompjuder-Hefte, die sinn ferr junge Leit. Unn, was moonder doo?, frooch ich.

Sie gibt merr Antwort: Er sacht, ess gibt noch vill Friehlingszeite, awwer nit immer so billiche Lápptopps wie jetzt. Dess muss ich ausnutze.

Die Fraa guckt se oo. Lässder sichs nit ausredde mettem Lápptopp?

Ess Kättche hott de Kopp geschittelt. Der heert nit uff mich. Weil ooner von eierm Johrgong gesacht hott, enn Lápptopp muss merr hawwe. Weil wenn ooner in unserm Alder koon Lápptopp odder koon Kompjuder hätt, dann dets nit long dauern unner hätt's Porzellan-Syndrom. Iss dess schlimm, Honnes?

Ich bin uffgestonne, habbs Kättche mettgenomme in moi Stubb wo de Kompjuder immer lääft, bin ins Google gonge unn habb „Porzellan-Syndrom“ oigewwe. Guck Kättche, saach ich, hier steht was dess iss: *Mann kommt vom Arzt. Seine Frau fragt: „Na, was hat er gesagt?“ Er: „Ich hätte ein Porzellan-Syndrom.“ Sie ruft sofort den Arzt an und fragt, was das ist. Der Arzt: „Ich konnte ihm doch nicht sagen, dass er nicht alle Tassen im Schrank hat.“* Unn dess soll doin Schorsch krieg, nor weiler koon Lápptopp hott?

Eiern Honnes